



Minggu, 06 Pebruari 2022

Ogen : Esekiel 28:1-10



"Manusia Biasa"



Kai kin bedana manusia ras Dibata? Si akui maka Dibata e si mada kuasa, mbelin ras mejin kel perbahanenNa, IA Dibata si seri nderbih, genduari ras sipepagi, tahan rasa lalap. KuasaNa, pemetehNa dingen perbahanenNa la erbatas. Tapi manusia geluhna erbatas; perpanna erbatas, pertunduhna erbatas, gedangna erbatas, pemetehna pe erbatas. Tapi mekatepkel siidah alu matata jine maka manusia si erbatas e ngejapken ia bali ras Dibata si la erbatas. Umpamana bagi raja Tirus si jadi oratennta paksa enda.

Raja Tirus meganjang ukurna, iakapna pentaren ia asangken kalak sierkemalangen man Dibata e me Daniel, kepentaren ras kebeluhenna erbahanca ia bayak, bayak emas ras pirak. Tuhu seh kel ia beluna, erbinaga seh maka enggo bayak kel ia, janah kebayaken e erbahanca meganjang ukurna. Kinibeluhenna e mahanca turah perukuren maka lanai lit rahasia si terbuni, akapna bali ia pentarna ras Dibata. Alu kata sideban ia ngejapken dirina e Dibata, si erkuasa dingen patut isembah. Ngidah ukur si meganjang e erbahanca Dibata nuruh musuh si kejam guna nerang ia, e maka kerina barang-barangna si mejile sienggo ipepulungna ndube arah kebeluhenna ikerneppen kerinana. La terjeng si e ia pe i bunuh jenari itamakan ku kuburen si erlau. Raja e pe lesap, labo tahan rasa lalap. Enda me nubuatan nandangi raja Tirus.

Banci siukuri maka uga ganjangna pe pangkatta, kinibeluhen rikut ras kinibayaken la banci erbahanca turah perukuren aku si makana. Aku sibeluhna, aku si pentarna. Pepatah ngatakenca *diatas langit masi ada langit*. Ingetlah kerina sienggo sialoken kita e iadep-adepen Dibata biasa, e maka uga kita makekenca guna kemuliaan Dibata. Ia kin ietehndu maka kerina sirehna i bas Dibata nari mulihken ku Dibata. Katakenlah bujur dingen tetap pindo pengarak-ngarak Dibata segelah banci si e kerina jadi pasu-pasu.